

四庫全書

集部

欽定四庫全書

文毅集卷十二

明 解縉 撰

墓表

翰林院修撰王欽止先生墓表

嗚呼功業既成而人推服之恩惠及人而人懷思之天下皆是也無功業而人推服無恩惠及人懷思古今天下之人甚少也若漢之賈誼唐之劉蕡其功業何所成

恩惠何所及其文章亦甚少也然使人思而嘆息之至
今推服之無異辭豈世之人惜俊才之夙成悲壯志之
蚤謝歟抑憫其不遇於世而以窮死歟予友翰林修撰
王君欽止諱良歿之日識者皆嘆息推服而懷思之其
朋友哭之盡哀即未與接者亦聞而嘆息失聲此足見
人心之公而行之孚於人者久也君少失父自知讀書
為文其祖與畊先生治尚書學聞天下著書經管見藏
於家矜式主意四書經疑貫通能發前人所未發兩漢

詔誥咸梓於世君盡其微為學愈勵而家事未嘗廢雖甚攻苦必親理之其母以君篤於孝君被病即告母曰我病且死幸有弟三人在我無足哀夭壽命也其母以為達於理言不及妻子此誠人情所難先是父歿時弟俱幼今得成立皆以為君篤於慈其族人親戚無間言皆以為宗族稱孝鄉黨稱弟方其在府學課試輒冠曹人不以為忌試江西鄉薦第一上親灑宸翰魁名天下賜進士及第授翰林院修撰未幾設文史館待之晉秩

一等分類秘閣書目預修高廟實錄總集類要祁寒盛暑終日不怠與胡廣等奏修時政記如故事參酌攸當屢上書言當時切務上皆欣然納之飭身正色不可狎玩聽其言侃侃如也然未嘗妄言其所不可行自奉甚約賙急如將不及與人交久而益敬其行孚於人也類如此獨其於死生之際從容安泰無毫髮可憐之色預與母訣斂手待終予往視之一辭不亂此足以信其平生所蘊非淺智之所能度者宜其感動衆人猶醴泉之

浸不必為江河芝草之榮不必為松柏而人信以為祥
洵乎功業恩惠未嘗顯著而人重其生存哀其沒世同
於賈誼劉蕡也君文章雄偉光耀常曰悖於理而工於
辭者非不知理悖也欲希世而盜名也吾切恥之詩詞
古雅一以理為主警策淵永字畫精楷皆稱其為人其
稿若干卷藏於家皆可傳也君連世與予家友善其伯
祖吾素嘗為館京師待我先祖真我公後為翰林編修
國子博士卒於官家君在太學為之心喪以禮葬之其

祖諱克耘與予叔祖觀我求我同舉進士克耘號野耕
元統癸酉科甲授吉安府同永新州事其族父無將與
予同登洪武戊辰第君與予弟文夫已卯同舉於鄉知
其族行莫予若也是宜為表而繫以辭刻之其墓君為
吉水帶源王氏唐末由袁之白芒來其先太原人也曾
祖諱孟贈萬安縣尹祖妣曾氏贈宜人父諱其尹避地
吉安城中千戶宋以女孫女焉是生君年十六母氏與
歸帶源娶沙田劉氏戶部主事芸庵先生之女子男三

人鑿錚鏤墓在高嶺園之原君生洪武戊申六月十五日歿辛巳九月七日也天子命治其喪者其妻之姑夫顏君子明也系之以詩

其辭曰頎修容兮內正直勇往義兮不組飾少孤立兮炳文章篤孝友兮譽彌芳超騰驤兮陟天路希聖哲兮同軌度火始燭兮泉發蒙防讀墓兮遭回風朋情鬱紆兮凜秋日高欲濟無梁兮遊水滔滔華芝殞兮醴泉竭靈徵長兮旨芳歇彼力渺兮任乖張循塗傾兮永懷傷

賢不肖兮非彼天何壽夭兮樛櫟偏於呼欽止兮材行雖不施有遺思兮無窮期

翰林院檢討廖君墓表

嗚呼余讀甘棠之詩而知古之人善政遺結於人心久而益著愈遠而不忘也然豈多有哉予友廖君敬先奉詔起修高皇帝實錄既至而事畢上曰此老儒即以為翰林檢討余退以告同官曾君日章王君汝玉梁君用行皆舉手加額曰昔吾縣之父母也問之曰豈弟哉古

人不是過也廖君卒於官三君子哭之尤慟嗚呼好禮君子者或不恤小人善撫微賤者或驕於士大夫方以在上者或好諛而佞己為守則易尉而為尉則凌守也惟豈弟者庶幾無是也豈不可稱偉人也哉廖君之為縣也其禮於士大夫君子可見矣其初為丞懷慶之河內地當西北之衝邑小事煩又當新附軍旅所過供具浩穰縣令久闕積不治君時年尚少也不數月政成郡守王興宗宿望老成然嚴難事大歎獎以為不可及縣

清化鎮商稅多陷匿布政司官來捕執其首為奸狀事連千餘家徵捕鉅萬不能足遂以委君君視百姓如家也區畫貧富相補不數日足其所徵逋布政司官大善更置酒為謝而去君考滿既垂髮戴白拜送道路多至垂涕者既至京師時方以蘇州為難治而屬縣吳江尤號繁劇朝廷謂君及興宗俱有名也廼以興宗守蘇州而君丞吳江興宗遇劇務輒以委君君不得專治吳江也時有富民二氏以水決圩田事數年訟不已至聞朝

廷下有司督其理屈者某氏修廢圩岸幾數十里岸廢
決已數年上下高深數十尺彌望水決無迹可求而某
氏又以富聞天下興宗謂使他人督之將為其賄所溺
事不集又煩朝廷遂以語嘗他官他官亦皆恐懼莫敢
往興宗大言曰宜莫如廖縣丞也君欣然往督其役為
之方法巧思出人意表如期而畢某氏亦深德君惟拜
謝而已不敢發一言君精敏絕倫吏抱文案叢雜手署
口訣頃刻而畢令簿拱手歎服未嘗疾言遽色而使民

皆不忍欺興宗值考滿當去老稚遮道去不得行君後
坐為人連累謫鳳陽河內吳江之民就視之背項相望
於道其居者夜則焚香祝之為之祈福人或問之曰君
何以能得人心如此也曰吾不知也吾視百姓猶吾子
耳嗚呼茲非但鼓舞有才者之所能也君諱欽以字顯
宋御史中丞剛之裔七世祖謙字益仲受學於朱子之
門仕為吉水縣尉因家於縣之東溪高祖彥翁曾祖季
宗祖明德世為士父觀字觀民始居於鄉之雙峯下號

退省卓然獨行之君子也自言平生未嘗對俗人一飯
與予先君子交最好篤於教子積書至多君為兒時從
先叔父刑部公學易君之弟敬存亦從學競爽刑部公
歎此廖氏雙明月珠也君又從羅如麓先生受詩經名
譽日起國初兄弟俱應江西進士舉不中君召試京師
優等歷仕南北聞見充拓詩歌清麗而時發其奇雄文
章典雅屢考試貢舉川廣之人士莫不謂君為藻鑑權
衡也君之季弟敬已剛介寡合特與予善而君諸子自

勤自廉兄弟嘗仕而休也予與黃季岳兄弟過其家焚
香看圖畫月明飲酒庭中徙倚竹樹下出浴溪水中行
歌相答及君奉詔復起以永樂元年拜翰林之命予幸
同官昕夕相見自勤復為蜀府紀善來巧相值談笑論
舊頻仰須臾而君遽以微疾不起萬古永訣夫在常情
如何其可悲也君自拜命以來既修文獻大成日務纂
書業而未就以二年四月朔得疾寓會同館先是予齋
宿與坐夜語其孫祖環侍側忽謂予曰是子聰敏可教

惜吾恐不見其成立也迨四月十日夜遂歿享年六十
有三妻王氏士族有懿德子男四人長自公省親於冀
北道卒予嘗為之作傳次自勤自廉自謹皆儒雅自勤
英偉善談論知名當世自廉力學善為詩五月得訃告
即涉大水來迎君柩歸葬於鄉山之原且奉狀乞為之
表將刻石揭之其墓君有女適陳伯瑋胡方來有孫祖
環祖田祖歸祖歡祖興世有庇賴也已於戲嘗聞君孝
友篤至為弟受罪自誣服感動獄吏為之垂涕泣天子

初見時問所經見即以民疾苦對故能膺天子寵眷其卒也遣醫勞問歎息之而吾黨之士皆痛惜之他日史館官不傳之孝友必傳之循吏也

麟榔藍先生墓表

高皇帝建都察院專治刑獄藍公子貞及詹徽為都御史未幾徽專任而子貞左遷漳州推官高皇帝慰諭而遣之幾月而漳州獄空屬縣南靖為山賊焚劫而縣以民反聞軍衛將出兵屠之公力請止單騎臨視得其狀

白免獲全數萬人公既没十有餘年而其子日省請予
表其墓嗚呼是非直道陰德故耶其世系百行翰林胡
公光大銘已詳不復贅為之詩俾讀而歌思之詩曰

藍君中山自唐家吉宋季勤王連嫺帝室烈烈文山忠
貫日月研席深交矢死鉄鉞有孫萬宇是曰瑞軒義質
早凋篤慶後昆顯赫麟輟瑞軒元孫少失怙恃克由仁
義慈訓成之祖母王氏而亦盛宗澤流無紀天假續之
迪其敏聰洞究經旨旁博經史夕惕惟寅不慕青紫弱

冠遇亂扶攜奔竄主於仁里橫經講貫賊不忍兵幾至
化成匹休古史善效有徵天朝洽一歸安其家益行其
學金輝丹華三徵七辟詔書旁午翻然振志教於大府
撫民奕奕靡有親炙教成浩歸茲欲斂迹初志弗成高
皇特旨召擢重官朝綱以明進退從容識邪與正天語
丁寧海濱用靖隱德所覃活者數萬卓然不磨有讀毋
慢

章江劉先生墓表

吉水章江劉先生既歿之後十有七年其孫宗平為翰林檢討將刻石為揭於其墓之原俾後之學有所考也縉之家學傳於東山楊先生靜春劉先生四傳而至元季大父伯中公諱觀仲正公諱蒙又講於吳文正公慨然有得精思力踐所至門人弟子麇至而從之乃建學舍於里東山之下四方之人畢集六十年間零落殆盡矣獨章江劉先生肥遯丘園志行純篤師表一時教人不倦實無愧於道學君子也蓋其平生未嘗發一非禮

之言妻郭氏死時年三十誓終身不再娶或微諷之輒曰有子足矣鰥居四十年如一日讀書絕欲一榻蕭然君子咸以為難少時學易冬不附爐夏不揮扇造次顛沛書冊未嘗去手奉親避亂所至遇盜賊不忍肆害皆曰此劉孝子也其誠敬之積自有感動人者如此洪武辛亥有司強舉至京師以曠辭題杜門不出門人子孫受學者教之宗平夜誦習諸經史性命道德之說亦自誦以助其勤每至達旦因命為縣學生曰其以行吾所

學焉爾必勉之性不嗜酒曰自聖人以下稍過即能亂
德鄉人亦多化之有出傲言者或曰章江先生聞之得
毋掩耳乎其人輒自慙先生諱珣字道章學者稱章江
先生生延祐丁巳七月沒洪武某年月日年七十二子
男一人諱同山泉先生以其子妻之克肖儀刑嗣有隱
德孫男二長宗平也名均次老壽先生家世榮顯本京
師人自唐游宦吉之安福宋季居於吉水之金灘其諱
通者六世祖也諱立仁其高祖也曾祖潛字淵甫宋進

士大庾簿尉備闕嘗立戰功祖元字仲元大庾君故饒
財仗義建義塾於吉水古城延四方學者聘須溪劉先
生為之師仲元為高座弟子元初時未弱冠按察使辟
為掾捧檄巡捕活永豐湖西民千餘家遷章貢司征調
吉水攝縣令而邑大治日以其暇講學於衡齋周先生
心遠聶先生古澗曾先生介軒劉先生靖軒夏先生奎
峰梁先生高祖莊山公故造詣高明辭官卒業因自金
灘徙居於吉水古城之東季大父伯中其子壻也父仕

先學於余家累世為同門相師友聞之過庭之訓莫不
推先生醇儒也嗚呼考其師友之淵源如此踐履篤實
如此又何必嘐嘐然有道學之虛名也哉

西山劉先生墓表

古稱鄉先生沒而祭於社祭之何也教施於俊良俗成
於長厚仁義所漸禍亂不作法施於民則祀之祀之宜
也故西山劉先生子彰始歿而人悲之既久而益思之
所至祭祀之固宜也矧其子弟門人狀其行欲表之以

誌不朽余可得而辭哉按狀先生壯年敏英家門儒貴
素性雄豪不解窮促言論鋒發辭義卓然鄉多儒者歲
時過從囊出其文字上下頡頏其門如市及丁亂從祖
趙州公舉宗奮義日夜戰其鄉闔門多戰死子彰亦幸
而不死隱憂致病晚益羸喘洪武庚申以賢良徵詣京
師骨立竒悚遂以得還遇喘時或坐以達旦嗚嗚然諷
詠書冊不離手與疾忘苦洪武戊辰辰縣官聘迎之訓導
於學鄉人始得見古人師弟子之禮其病卧於家弟子

羸糧景從拜牀下受請指畫皆不逾時貢於鄉舉於監
丙子之秋一日予方坐其館座上有報曰趙哲先生徒
也舉在前列先生之力也衆賓客闕然走賀人擁先生
行過哲家哲父殷勤謝又報曰劉宗平先生徒也舉在
前列先生之功也則又簇擁先生行過宗平家宗平父
殷勤謝又報曰先生令子迪哲前在試操筆疾書即投
卷嚮蚤出漫不加省廼徑得捷轉相賀先生先生扶杖
接拜跼轉歎息曰吾恃弟子與子將圖佚老為朝夕之

養一旦及門輒欲之官去老者何所復望哉既而歎曰
吾負荷先人遺業守經術以崇正闢異病且死不敢蕪
其勤以淑於人今幸而有子若弟子將施於世死不恨
矣未幾遂歿時洪武丁丑二月二十五日也然則雖如
古人釋奠可也非祭於社而已也先生家吉之泰和宋
初徙吉水文昌夏郎高祖新民宋寶祐進士曾祖實翁
元貢進士號竹坪先生伯祖震字伯振元進士朝列大
夫知趙州世稱蒼篴先生祖康達號竹西先生家君外

舅也父諱鳳字孟敬至正貢士母張氏公生十三年而孤事母孝趙州公及叔父貢士君鶴臯教之甚篤先是人稱夏郎劉氏治尚書有名雖歐歛八世家傳迨弗能過元盛時王克耘等皆出其門今惟先生得其奧以力行天性嚴與人義建祠修譜親親恩厚白首不渝有四書要覽文集若干藏於家生至順壬申十月二十七日享年六十有六娶顏氏進士顏成子之女子男一人迪哲也名桓葬先生於沃塘山之原予為表其墓

蕭君師文墓表

宋丞相信國文公兵敗於吉之空坑也有石大如數間
屋忽然自山頂震落當路徑元兵望而大驚稍却丞相
由是得脫去鄒鳳輩以餘兵拒戰死傷塗地父子兄弟
相勗冒白刃不少却時吉水倚富蕭文琬父子督饋餉
亦在是役幸而不死退而筆記是日事甚詳予獲見之
可羨哉吾鄉之多忠義也而今宋史廼無之傳云丞相
空坑之戰得趙孟滌紿元兵以免而已蓋宋史作於元

盛時故於丞相事特誣陋至云丞相求為黃冠等語欺罔尤甚顧豈足為丞相輕重哉然恐相襲訛謬不可不辨也文琬南唐御史大夫儼之後倚富之墟儼之基在焉文琬上距儼十世家世節義本其風流文信公嘗大書餘慶堂以勗之文琬生獻可獻可生季章季章生德祥字元佐皆忠厚人也元佐生天祐字師文元季傾貲奮義保障其鄉鄉道官軍舉宗血戰每望其旌而靡元參知政事金子仁承制授主簿不拜時里有劇賊擁衆

數萬師文宗族梗其喉牙賊不勝憤圖掘其先墓以逞
師文與之苦戰賊勢益熾師文恐不免即自取墓中遺
骸身負之出走藏匿還與官軍合勢大破之其忠義節
孝類如此誠有光於文琬常恨不得主帥如文信公者
與之一死光明俊偉可書也不然師文豈在鄒鳳輩下
哉惜乎守吉安者纔一梁堯中尚完城數年師文等不
為無力也及天兵南來師文不忍賈勇謝散其徒遣弟
師賢率壯士從寧河王鄧愈破熊天瑞於贛亦奉身歸

第口不言功予因蕭氏重有感於吉士多忠義又重有感於宋史之謬也考之元史又獨著金子仁傳而梁克中無之豈知子仁極不足道驕淫不事事無智畧其死為人所逼非得已者謬得美名不如梁克中更不如蕭氏兄弟也而隱顯若此可勝嘆哉師文容貌儒者直諒敦實家富累千金一門三世同產百餘口飲食衣服一出公帑庭無間言撫兄弟之孤逾於已出未嘗一飯無賓客每食前方丈考鐘鼓大飲高會連日夜人不以為

侈遠宗貧鄉人賙恤之備至其卒於外而子扶櫬以歸
弔哭之聲震天嗚呼何必附青雲之士哉吾知其施於
後世矣其母彭氏配李氏子士益字世用繼室張氏子
士秀字世選士柔字時徽孫茂實英聲海濤穎乾震其
生元延祐丁巳八月沒洪武辛酉二月葬里溪陵之原
前誌奉議大夫刑部郎中蕭公用初作今為表特加詳
焉則按士柔所為狀也士柔好學善為詩少時常與之
登倚富諸山臨瀧江之上想師文兄弟之高風英傑豪

偉之氣尚凌厲於烟雲落照間可激昂而興慕故為之表而不辭也系之以詩曰

溪陵有原青烟盤盤其陸璠璵采雲團團瀧江之濱華第嶙峋昔有英傑今其子孫食德之長怵惕露霜有此蘭蕙接其榮光義烈軒天九族蒙恩於戲百世式象其賢

宗瑞周君墓表

先外大父封州高使君元之名臣居鄉恂恂未嘗騎乘

時時與本立周君游蓋亦恬淡之士也元季之亂本立之子宗祥舉義兵為保障先君還自元都往來其間嘗與余言宗祥善待士慷慨豪舉有光其先世其弟宗瑞恂恂謹飭教授其家恬淡如其父也余生也晚皆不及與之游獨嘗親於父元輝先生與語其家之詳也蓋先生嘗主其家其家子弟皆從學宗祥兄弟所以事先生者洞洞屬屬然庶幾古之人宗祥之沒也先生誌其壙示予讀之焉厥後因過其家與其子弟宴飲追思而考

論其遺為之倚茂樹臨清流裒裒者久之今年宗瑞之子吾復奉予友胡君敬方所為宗瑞行迹一通不遠千里至京師請為之表將饒石立於其墓之原嗚呼使一家一鄉斯世至於後世皆慕如宗瑞兄弟也何古人風俗之不可復哉蓋奔競於名利者世之大患而風俗之所由薄也胡君之稱宗祥之舉義兵也屹然為鄉保障遠近被兵者輻輳於其里及宗瑞之門皆篤意教之衣食不給者就館穀之每有所廉讓調恤不為矜色不為

德容兄弟克盡友恭宗祥一飯盃酒宗瑞不在不舉也
且兵亂數十年後至於今始復承平之舊比比皆然獨
其兄弟所居醪橋數十年不被兵燹民物安堵自國初
已殷阜弦誦之聲相聞每縣令行春必至是四方來觀
相勸於乎宗祥兄弟之功夫豈少哉是不可無表也宗
瑞諱郁澹然其別號云沒以洪武庚午享年七十有七
矣

周君宗祥墓表

君諱監字宗祥吉水醪橋人祖原善父本立皆篤厚隱約君少有智識父甚奇之曰振吾門者此兒也稍長内外承迎罔有違闕元季之亂一市人皆求請君為保障君與子吾文誓衆為義兵不蹈非禮皆挈家引却東山下以伺賊釁賊果焚醪橋縱擄掠君之子率衆逐人人皆奮以一當百賊大敗走衆志既定為營水陸以應官兵時吉安守臣梁克中治水軍於大州大喜賚以白金綵幣俄以功陞吉水州判官甲午歲饑告糴於軍門得

粟以賑所活甚衆隣邑之居民避賊者扶老攜幼來依庇君君撫納之如將不及有山寨致重貲請其仇家將甘心焉君答之加贈黃金委曲諭解之其人釋然愧謝為家塾訓其子弟延先生親執禮甚恭世方捨攘弦誦之聲不絕由是名士皆喜過之性尤喜接賓客久而益虔歲時歡宴必盡醉乃已與弟宗瑞最相友愛今天兵南來君以兵屬其子從征贛還亦辭營歸養君晚歲安健子孫滿前同堂而食庭無間言先公歸自元都時與

梁克中協謀守吉往來鰲橋常主宗祥家父子尤相敬
愛家君每為予言而予生也晚皆不及與之游而嘗過
其門識其後進子弟撫其手植庭砌之木皆已蒼然可
念名園臺榭依然尚存門俯碧流之水毫髮可鑑而其
旁有廟丹青漫漶君之題字猶在壁間想其冠蓋之都
賓客之盛而君之平生志意豈不樂哉君生皇慶壬子
七月十日沒以洪武辛酉五月十五日享年七十娶陳
氏能勤儉內助子男四人吾文吾忠吾信吾敏孫男十

三人其墓在里大塘之原請為之表者其孫宜哲也

幼道許君墓表

吉水俗尚世家親戚朋友交游雖經亂廢其父兄相與教詔其子弟子弟相與奉養其父兄若同堂一姓先君子為言若大父與如愚黃先生明德夏先生山梧許先生相講習予與日孜夏君茂明許君皆從游日孜舉進士先得名其所對救荒策山梧之所宿構也三四年夏氏黃氏已成古人獨山梧有賢子孫今幼道茂明之子

也元末之亂予在元都若大父死節祖母寓於水西黃氏許氏相庇後予客洪州陳友諒破城人傳言予已物故茂明事若祖母盡禮是雖吾鄉俗尚之厚若許氏其尤賢者歟幼道少淳敏好義甚有父風若所當友也緡識之不忘後先君子學於環洲幼道時寓婦翁家其婦劉氏賢內助也善承夫志才能綜理內外肅然下至臧獲動必由義先君子每至其家飲食供具必旨以潔先君子亦必為之盡禮語予曰其家刑于之化內行整齊

亦可師法者也。縉又識之，不忘自是。與幼道往還間語及亂事，蓋幼道生三年而遇壬辰之變，長於流離奔竄之日而卓然自立如成人，未嘗逐兒童嬉戲，每寇至避匿輒抱其故書冊，人或嗤之曰：「金玉不足寶，此先祖之遺何可棄也？」茂明入國朝仕為武鄉令，以卒幼道事親盡孝，每率其家人鷄鳴而起，力踐古人之禮，家人化之，亦不以為異也。居喪有聞人，以許孝子稱之。性慷慨輕財好施，尤厚於交友，或有急難委曲周旋，不避危害，死

無所歸者輒為收葬聞訃則為位哭奠之洪武戊寅以
明經舉分教武學學在虎踞關上其下臨大江諸生每
去後蕭然如萬山中人有一不堪寂寥者一日大雪予往
訪之時已晚張燈煮茶武臣子弟稍稍來待以酒果進
與共賦談論達旦觀其意氣無不滿於心者予又益自
歎先君子知人之明而幼道果能不以外物動其中為
可師法也間嘗有親戚之喪與俱送葬於國南門之鳳
臺里幼道慨然太息謂旅葬者有子孫不能歸骨此何

等忍人嗚呼孰知幼道以永樂二年正月竟客死虎踞
關而亦旅葬於茲耶幼道有子清好學能世其家將舉
其喪歸葬於鄉環洲之原故為之表而係以詩曰

慷慨許君高誼薄雲緩急可倚信義是視事親以孝可
以成教弟子恂恂革其軼驚君敏好學長於議論抵壁
揮金未嘗顧吝生不慕富死不怨貧其藏其密永利嗣
人

家處士元琛墓表

處士雁門解氏諱琛字元琛淵靜先生諱泰之子萬安
學正浩軒先生之孫宋太學進士莊山先生之曾孫也
連三世不顯仕而隱德益厚處士君曾祖縉紳之高大
父也高大父諸孫顯者亦多矣處士君年纔四十六以
卒而素志亦在於隱豈非種而不食有慕於莊山先生
者與處士生至元之己卯沒洪武甲子縉紳時尚少覩
淵靜與王夫人哭之哀也淵靜時年七十餘矣衰麻白
髮弔者皆悲痛縉紳有以知處士之能友也君之沒至

今二十有四年矣君三男皆學為士而長曰約字簡夫尤工文章耽隱如君狀君之數千言俾為之表刻於墓嗚呼君之臨沒也王夫人問何言但曰恨為子不終簡夫從學淵靜未能文章如今之所為狀也今淵靜之沒亦二十年簡夫又改葬君又能述君之羣行圖不朽也淵靜之哀與君之恨寧不可以少慰乎狀曰君少從伯父觀我求我學時二父已歎其穎敏十四遇亂侍親避居於鄉之高源未嘗廢學冠而及門之徒如雨愚夫暨

子皆有啓悟其鄉人至今懷之與弟元章相友出入必偕昕夕講學怡如也弟疾病扶掖之湯藥必親弟沒抱尸泣三日汨盡繼以血友愛如此郡縣交薦辟之諸兄元溥元魁元震元祿皆出而仕君歎曰父母老矣賢弟亡矣諸兄又皆出而仕矣吾可復為利祿而離吾二親耶乃衣短褐黃冠走匿於鄉之韓相山之陰久之為小屋以居每三日一至親舍皆戴星往來惟恐有記其姓名者躬耕治園圃讀書自娛雖蔬菓熟未獻二親不敢

先嘗登山臨流徜徉諷詠治經不惑傳註訓詁以踐履
為先為文口占腹藁不以示人世好紛華澹然無所嗜
狀所稱如此嗚呼非可謂之篤實君子與若簡夫非謂
善言德行孝而能文者與君之配比隣江氏名家有行
與君同志庶幾古所稱老萊之妻者君次子縵質夫三
子紹彬夫君之墓在鄉之東營山之原詩曰

雁門解氏遷廬陵自唐於茲七百齡所希隱德多顯榮
有種斯獲前可徵處士後將莫與京起視韓相山崢嶸

鑑湖阡表

解氏鴈門人自唐家吉已七百餘年至封王封公德盛
顯極矣篤於先公其學以主敬為本戒慎恐懼終身未
嘗有一息之間然慷慨英偉料事如神對衆吐辭賢愚
屏息歐陽文公嘗指謂先曾大父曰他日高年盛德之
豪傑也果如其言羣雄皆知敬愛所在不敢兵有所斷
議衆不能違晚遇高皇帝待以前朝遺老召與極論元
事甚善其對既而曰國初何不仕對曰國初以二弟事

陛下今以二子事陛下上慰諭歎息時敕臣縉奉家書上覽屢與吏部尚書李原名翰林學士劉三吾語而稱之縉嘗宴見必問及安否至起居細事縉被特恩得歲一歸省卒許終養時洪武辛未五月也後四年復召以長子綸侍還公感恩邵德篤敬而誠於是已八十有四矣公治五經皆有師授書易得之家傳講於竹坪劉先生始授春秋於如愚黃先生至正初入太學講於吾素王先生元慶毛先生學禮於太古熊先生少時學詩於

申齋桂隱二劉先生後益為古文辭詩歌師事黃文獻公揭文安公卒業於楚國大司徒歐陽文公之門代為文辭書札楚公自不能辨公弟闔年二十與公同日胄監監舉公第一闔聯得舉二解聲名卓然出數千人上將會試中書而亂作矣公倉皇南歸乘單舸經賊中數千里至吉時至正甲午南北音問久絕吉安守臣梁準克中等至欲散去公亟往見之克中大哭拜不能起公正色責之曰我自京師單舸南來所過人聞朝夕皆能

拱手送迎王師百萬至矣大夫行且受賞歸朝何至悲
啼自沮克矍然起謝因求計策公為之移書招附羣雄
及他郡邑賴以完保十餘年歲戊戌公移書陳友諒弟
勸其殺偽主以歸元而友諒謀稱帝公因之南昌南昌
為元守甚堅友諒急攻拔南昌公不得已奔還與義士
劉明道等拒之於吉水其偽將熊天瑞也雅知公斂兵
去攻陷吉安遂上據贛公往說之因陳友定以歸元友
定時遣江伯昂至以朝廷宣敕啗天瑞既許諾伯昂去

而天瑞猶豫持兩端公歸吉與義士孫本立等謀殺友諒偽官以應友定而本立等以附本朝海道使者復至自閩以先祖死節贈官以參知政事宣授公辭不拜使者委致而去公遂遁迹山中國初以賢良徵至京師懇辭明年戊申始克還癸丑復被徵至江西以疾免歸確乎廉分淡乎聲利家法嚴如朝廷忠孝成於天性以父死王事時隔在萬里忌日每臨悲慕摧絕間居深念終身未嘗正席而坐母徐夫人故宋遺老林隱先生之女

習經史性嚴毅公事之亂離生無一日拂其志歿無一日忘乎哀平生師友故人徧於天下寄之以死托以孤遺盡心竭力未嘗自伐其勞未嘗有怨於人度量之宏偉如也為文根柢六經渾雄自恣若降時雨若決江河讀之使人快意為詩雖在亂離絕無憔悴窮蹙之態會文切理洞中事機每酒酣樂作得意笑歌座客盡傾其浩然之氣可謂壯哉洪武辛未五月初吉上詔臣父於華蓋殿曰是子大才其以歸教訓十年而用之不幸洪

武戊寅五月十日乙酉高后賓天是歲十一月二十三日乙未先臣捐館遭讒竄逐泣血萬里幾欲無生今歲庚辰十月始得歸葬先人於所居之鑑湖阡從治命也嗚呼少承君父之教報之罔極言之痛心謹叙次族行表揭於阡先公解氏先世居雁門唐天寶中始祖諱隱子德遠諱禹父子皆進士隱仕為蘄州司戶參軍禹為吉州刺史遇安史之亂家吉文水西臻善里在今吉文水西跡符南山之麓生宏材諱幹為左武衛兵曹參軍

生得與諱駟號真白處士生兼善諱從美咸通中舉進士兼善生世隆諱盛唐季之亂始遷於吉之寨里世隆生臯謨諱弼臯謨生麗正諱文祭麗正生伯軻諱希孟舉進士為濮州知錄叅軍事嘉祐乙亥奉父隱居於鹽嶺之鑑湖上濮州生世維諱持國以三舍法陞仕臨江軍新淦尉世維生慶邁諱千齡號文江文江生敬之諱夤敬之生邦卿諱必達邦卿生子春諱谷淳祐漕貢進士漕貢生昭子諱夢斗號莊山太學生太學子辰叟諱

應辰號辰峰元勑試貢生永豐教諭臨川學正瑞州路
儒學教授永豐縣簿致仕先公大父也先大父字真我
諱子元號竹梧至正乙酉進士得便道養親仕為安福
州判官遷太史院校書郎授承務郎東莞縣尹元季死
節於鄉有贈官祀於忠節祠大母徐氏里中林隱先生
之女林隱殷家有知監再世深德其助先公少從大父
學後又徧受業於經師有體有用在朝在野諸公俱器
重之至正甲午以先祖死節事聞歸吉討賊時南方已

大亂吉安城守梁克中等至欲散去公始為言朝廷德
意宣諭禍福衆皆信之城守復完然以母老常避依義
居入國朝遂遁迹山中歲丁未徵詣辭還縣令費公震
師事公國初建學攝鄉校後縣令李公恒甫廉有治聲
事公尤謹作興士類公力居多歲癸丑以賢良徵復辭
歸前此嘗主考廣東江西湖廣鄉試稱甄拔得人洪武
戊辰二子聯中甲科高廟數稱公善教每有家書至必
取視嘉歎辛未入朝賜坐勞問有楮幣之賜以臣縉侍

還甲戌入朝以臣綸侍還先公亘古之豪傑也魁岸山
立威儀檐整音吐虹暢議論英偉昌言萬衆之中賢不
肖皆為悚息剛毅廉儉一木榻三十年土屋漏穿布衣
疏食顏如渥丹下待僮僕其中肅肅其外頤頤然蓋生
平以敬為主胸中暢豁無纖芥凝滯其自視如光風霽
月人望如秋霜高岳此本乎性篤乎學而發見乎外者
如此嗚呼今尚得而瞻依之哉公諱開字開先生元皇
慶壬子二月七日之亥終明洪武二十一年十一月二

十三日之辰葬鑑湖上初娶劉氏繼黃氏無子繼高氏
先妣太夫人也子男三人綸大經綱大紀縉大紳女二
人一適廬陵彭某一適黃金華孫男莊春廣春山呼婁
金孫女長適東溪彭懷次適桑園周恂次適城南藍謚
次適蕭肇敏次適周光華建文二年歲次庚辰十月朔
越十有六日男翰林待詔縉表

翰林修撰眷姪王艮填諱

先妣高太夫人鑑湖阡

解氏鴈門人唐至德初肇家於吉至今七百年餘世有
賢內助先妣高太夫人諱妙瑩字淑婉高氏自南平至
崇文裔孫逸為吉州判官因家焉曾祖龍光字申甫宋
漕貢進士學者稱草窻先生祖願賢亦大儒學者稱守
忠先生以子貴贈同知泰和州事考諱若鳳字在翁學
者稱灞雪先生至治辛酉進士朝列大夫知封州母周
氏故宋進士周路鈴公孫進士知天河縣諱以仁公女
家法嚴整累贈渤海郡太夫人封州公以大定乙丑判

建昌太夫人生於廨舍后歷官南昌南安平江常迎泰和公就養太夫人亦從太夫人封州公第四女也最鍾愛勤儉不驕寬柔能泰孝惠靈承出於天性時方尚隆盛奢僭相仍太夫人獨尚簡整羅綺朱鉛俱不屑盼多聞卓識封州公每致歎焉嘗入室見黃金數餅即避出戶去不問封州公素廉有德之者致文綺數篋闕無人委之而去太夫人見不顧讀書自若自經史傳記天文地理醫藥之書皆能論析善小楷嚴正森密封州公每

擇象犀金龍筆墨文牋賜之曉音律筭數間作歌詩輒
棄藁紉製衣裳織繡麻縷女工之事無不敏妙嘗同女
兄弟繡高王經象施於蘇之天王堂觀者填溢所至婦
女婉而師之至正壬辰四月兄鏗鉅舉義兵母周太夫
人卒於戰艦五月先祖太史公諱子元兵敗為賊所執
大罵死之先二日封州公在廣攻龍潭賊中流矢卒於
軍事聞於朝使者由海道追贈推誠盡節功臣資德大
夫中書右丞子金銓師逾年城陷死之贈推忠効節功


臣榮祿大夫江西等處行中書省平章政事至正癸巳
鉅提兵復吉水與賊戰於鄉兵敗為賊所殺吉州震駭
家屬流離太夫人喪葬無違禮泣涕不食肉者逾三年
其事父母及姑叱咤之聲不至犬馬未嘗出一惡言先
祖妣徐太夫人最號嚴事終其身未嘗拂其顏色事先
公義以順相敬如賓不妄言笑嘗曰婦有長舌維厲之
階豈惟婦人多言多敗人莫不然性不嗜飲嘗曰先姑
有言婦人嗜酒決非貞良汝曹戒之豈惟婦人家之敗

子鮮不由茲其制諸飲食菜果醢醢之屬皆簡便有法
著酒食議若干卷女德評若干卷高文海死節事一卷
文海即鉅也避難徙適無寧歲料機脫禍陟險履危沉
毅鎮安不形愠喜往往出人意外意表縉兄綸亂離無書太
夫人手寫孝經論語古文杜詩教之縉自能言時蚤夜
訓以敬身維持文墨不離其側未嘗令同兒童嬉戲為
言宋元來政治民事記及日時無所遺謬又言封州公
至孝於父母周太夫人善事其舅姑故封州公兒女自

幼時不聞相詈周太夫人念媵子同於已出太夫人友之過於已同產由是篤於慈愛子孫六七歲猶不免於懷溫言善道無幾微呵怒見於顏面諸孫多視如母克盡其孝焉至其賑窮賙急如將不及待恤孤嫠提攜盡誠極愛人無間言每歲多病不廢盥櫛衣履褻易唾涕棄置必於屏處敬終如始不以富貴患難有渝天性然也臨終時謂縉兄弟曰死者人所不免吾年七十餘子孫滿前過吾父母兄弟矣但當與汝曹永訣不得不悲

耳因泣數行下家人盡泣太夫人復止之曰死猶枯株
生意不貫漠然氣離魂無不之魄如遺矣葬送物備於
亡者無益金玉珠貝尤非所宜本出私愛反成奇禍吾
經離亂所見多矣葬我必依近地素衾結髦朴棺深穴
斯可矣聚家人與訣端坐而逝嗚呼痛哉時洪武三十
年丁丑十一月二十七日之戌也享年七十有三生乙
丑十月十日之辰時三男綸綱縉一女適廬陵彭懷孫
男五莊春廣春山呼仍壽慶壽女孫七人皆在室葬所

居鑑湖從治命也永樂四年歲次丙戌六月朔越十有
二日男翰林學士兼右春坊大學士縉表



文毅集卷十二

欽定四庫全書

集部

文毅集卷十三至
五

詳校官檢討_臣羅國俊

中書_臣劉源溥覆勘

總校官庶吉士_臣何思鈞

校對官中書_臣吳裕德

謄錄監生_臣范墉

謄錄監生_臣徐瑤

欽定四庫全書

文毅集卷十三

明 解縉 撰

墓誌銘

吏部尚書陳公墓誌銘

余奉詔纂修太祖實錄觀自歲癸卯戡定陳氏彭蠡之戰至動星象衆庶咸見而四方豪傑之士雲合響應輻輳而爭趨之雖湯武之得士未能過是何其盛哉至歲

甲辰即王位而浙江取次平若廣信陳公修太祖所尤眷注者也是以首擢理官講畫律令崇寬厚而省繁苛復倫要而黜姑息光明正大四方翕然知有一統之制作由此始焉繼而又以為兵刑政治之大者也唐世府兵之制稍為近古而未精密乃擢公兵部郎中其所以任將帥養士卒得內外相維之體兵農相資之意遂為萬世之法而公之昭顯成德益以著焉太祖初即位山東新附念濟南重經王氏之亂民墜塗炭尤甚大將多

練兵屯田其間非公莫可治也遂擢濟南知府居二年而政成太祖嘉之以天官六曹之長而明經習制建官均職惟公是宜擢拜吏部尚書引據古典參酌時宜審地劇易制事繁簡貴賤踈數遠近寬嚴課功覈實賞錫黜陟之類皆公啟之未幾卒於位繼之者莫能移易也余嘗謂太祖之治天下也其事有緒而若素定於猷畝之中誠所謂天授之者而一時勲舊臣才碩道全經文緯武皆非近世之所能髣髴其一二者於戲盛哉今尚

書公之歿四十餘年始得其子九成為之狀求為之刻
詞於石按狀陳氏自彬始有聞於信之弋陽生應龍應
龍生文光號南隱贈廸功郎生萬理字德甫號梅澗任
信州路歷山長教授贈黃巖州知州生三子曰誼字天
驥曰敏學字志仲號亦梅官至平江路總管府治中曰
宏字任遠蔭韶州路乳源縣主簿公之父也母張氏公
生至正辛酉九月十九日沒洪武辛亥七月十三日享
年五十有一夫人楊氏今年九十餘公歿二年九成奉

母隱居於桂徙南寧今家於貴縣之郭門有子三人曰
鏞曰銘曰鐸鏞之子璉銘之子瓚鐸之子猷為之銘曰
廣信之山龍虎鬱盤弋陽九華連峰巒岼篤生偉人逢
時經綸悉所宜歸乘運躍鱗聖人好生明刑飭法與定
章條惟有欽恤制兵之宜因仍歷世寓農講武經久無
弊山東初下兵民雜居朱幡皂蓋往來撫綏朞年政成
歸掌銓衡平均四海位冠六卿我抽石室用纂六經敬
服德業副其聲稱著之簡冊復為此銘邦家之光閭里

之榮

戶部尚書郁公墓誌銘

永樂三年八月五日戶部尚書郁公薨於位上遣官祭以文命工曹具視輟朝一日顧翰林學士臣縉等歎息稱其才嗚呼公之哀榮始終固可美國家所以待臣庶恩禮之厚尤足以激勸於當世公之子孫豈不永有庇賴歟於是其子彬衰麻踵門泣而致公之治命請予銘其墓噫公與予交二十年未嘗爾汝褻狎亦未嘗挾長

殺敬禮予二人者亦自信為誠實洪武二十二年予侍講華蓋殿中公始受命為戶部度支主事賜名新明年轉戶部司屬十二年陞北平部郎中二十四年六月起授嘉議大夫戶部右侍郎考滿上於庭中稱譽擢尚書授資善大夫十三年於茲矣非負天下才而能之乎抑公之盛福其祖考以來積累之慶非偶然而致也公家素饒財慷慨豪舉不為齷齪喜賓客樂於賑貧乏不為德也洪武中奏事廷中被顧問天下戶口漕運地理險

易計數時日應機響答無遺謬共謂劉晏以下不踰也
晚歲多疾乃時在告上甚憐之公亦時語予曰吾覺衰
老恐旦暮先朝露不能報國恩吾平生無卓異惟君知
也幸與之銘其墓紀其榮遇而已嗚呼公非可謂達人
歟公蘇人也曾祖仲和祖瑜父德字銘本公以至正丙
戌正月十四日生於吳縣洪武元年祖父遷居鳳陽臨
淮縣公隨家焉夫人嚴氏綜理家政嚴而有紀彬字孟
文亦克孝敬公嘗屬予曰他日視彬曰此故人之子誼

猶己子也墓在臨淮古城之原銘曰

古大司徒職惇典禮馴擾兆民豈惟會計惟公奮身亦以愷弟恂恂怵怵爵祿之器歷官有年光榮後先豈曰其才有得於天豈無人謀不如盛福崇崇其阡臨淮其麓

國子祭酒徐公墓誌銘

永樂四年春翰林修撰徐公旭被命為考試官無疾而卒上聞悼惜為文祭之勅賜棺斂送之如故事先是公

以眷屬從仕者十餘年不家食念先墓祠弗飭子年十八行冠禮而速之歸傍無童僕與公友者迭為喪主受弔祭連旬乃已京師之人莫不艷公以為榮益知聖主所意嚮而儒者之所為貴且重也公素有盛名其為吏考功也綜覈名實是是非非殿最嚴甚棘棘不阿人視其面莫敢發言干以私者以故天下咸曰徐考功而被黜者頗惡之然亦莫敢謗也予嘗與修太祖實錄及纂書禁中又見公之學問文章過於其所設施者而考功

之名蹟又其毫芒也於是翰林鄒侍講仲熙授以公門
生修撰吳溥所為行狀稱公字孟昭少穎敏而沉默有
高志年十四從鄉先生蔡深淵仲受春秋學即通大義
能屬文為族父所奇重洪武乙丑登進士第為浙江巡
行監察御史入禮科為給事直日記註太祖欲老其才
而用之命分教房山丁父憂治喪有聞服闋授鳳翔教
諭考河南鄉試入朝告歸省其母時母已疾病公倍道
兼行至家母病忽愈後數日卒人以為孝感服闋為安

王紀善詔求直言公條上六事皆切當於時用薦為知州入史館考試禮部貢士時稱得人復上書言事當路忌之故除考功員外以為迂濶將不任事不知極卓卓樹名如此何其知公者少也聖上即位擢公郎中與修實錄成擢朝列大夫國子祭酒同僚以事中之調叅議雲南陞辭上留居翰林廼以史館修撰纂書禁中為副總裁遂以此終嗚呼他人雖不能知公不悅公者亦衆而聖天子深知之所以恩榮終始為儒者之至榮也使

公有年聖天子所以任之豈但如是已哉狀又稱公性
方嚴善固守不為流俗所移學問亦非世之務為博洽
者比文章贍而雅居家在官盡職無所詭隨訓諸生皆
有成就尤喜薦士所引拔甚多皆知名當時周人之急
如將不及疾病艱危能為盡力皆信而不誣者也予嘗
為公銘其季父之墓知其世居南昌五代之際有諱宗
部者始居饒之樂平宗部之後十七世孫諱式者建樓
藏書以教子弟鄉人號曰書樓徐氏又五世至應麟登

宋淳佑進士第公之高祖也曾祖奇夫太學上舍生祖松友考公明皆業儒不仕妣江氏公娶某氏子男二人女一人所為文集若干卷藏於家公年五十有二將以某月日葬某鄉某山之原嗚呼公之世德又如此而纔及中壽子未有聞天之報施其不有所待耶銘曰

巖巖徐公面目冰兢兢不撓庸俗驚嚴辭直氣矜不爭
謹論屢叩天子廷有疾畏之莫敢輕保全終始天威靈
思文服義多友生萬世不辱太史銘

監察御史陳公仲述墓誌銘

公諱繼先字仲述姓陳氏其先金陵人也十八世祖暉
始居吉之泰和族盛至數十人業儒多宦達鄉族無與
為此有諱先得者學行純正號菊存先生元初為贛州
路儒學教授致仕以子貴贈萬安縣尹公之高祖也菊
存生學禮仕至贛州路推官致仕公之曾祖也推官生
以道潮州路儒學教授公之祖也教授二子長曰有慶
即公之父也公生元至正庚寅四月三日推官晝而假

寐夢神人持一皂纛監其聽事前寤而生公推官大異之曰必亢吾宗稍長穎悟異常兒七歲善屬對教授先卒推官鍾愛之未幾遇亂推官沒家益貧困公撫穉弟獨與母蕭氏居姑之壻劉崧憐而教之學通詩經而又肆其力於古文隆寒盛暑手不釋卷庶幾貧而樂者也以郡學生登洪武乙丑進士第明年擢山西道監察御史調山東道出按治山西福建聲光赫然小民與士大夫之賢者皆愛慕之還調廣東道決獄稱平勤事不怠

一時章疏奏覈多出其手暇則為文自娛求者甚衆亦
不拒之四方名士識與不識皆稱陳古文而不名自來
京師夫人曾氏留家養母獨居舍一榻蕭然旁無童侍
䟽食飲水十年如一日往來書問至家幾百餘紙無一
語及利私洪武癸酉六月二十一日歿於官歿之日橐
無餘貲篋無完衣廩無餘粟餘書數冊而已聞者莫不
悲之曾氏同里人紹有先生之女亦能甘於窮約子一
人曰賞永樂元年以春秋舉其鄉今年會試黜於有司

蒙恩得還鄉里廼持其翰林修撰梁潛所為公行狀請予銘嗚呼悲哉予少時家兄大經歸自府學得公所為文家君讀而稱之曰故家有子孫後又得公庭對策讀之益加羨慕後官京師始與公相識同朝者幾四年往來情好甚篤公廣頽隆準面目嚴峻身若不勝衣而言論確然人皆謂誠端士藹乎其可親介乎其不可干以私也吾往年已嘗為公銘忽夢見公以為未足以得公之詳而公亦未葬也今公之子賞始克葬公於龍門之

原而賞之篤實又甚似公余又慶公之有子也乃悉按
狀而為之銘曰

有偉陳公出於名宗休祥先徵譽望益崇鄉稱碩族為
名進士為才御史傳以文字籍湜之徒可參翱翔擬倫
絜矩公有剛鋈龍河如池山石如砥有銘斯阡有頌無
已

翰林藍君日省墓誌銘

永樂四年春天下士會試南宮狀出囂然稱屈聖天子

臨軒覆試副榜三百三十有一人余友藍君勗中第二
名特賜冠帶同進士及第入翰林為庶吉士又四年授
典籍欲其盡識中秘書聖天子意甚盛也勗亦自感激
又三年卒於官其兄紹永遣其子猷扶櫬歸葬於歐鄉
羅富之原且為狀與其嫡子繼昌踵門求余銘嗚呼余
忍為銘哉君自少從予內兄子章劉先生學朝夕相見
當覆試余為讀卷官去年相見飲酒慰勞甚歡而何意
未朞年而遂銘君之墓耶君字日省與予友劉日昇生

同年月日時皆洪武壬子十一月二十日之亥子去年
歸日昇卒銘其墓今年歸日省卒又銘其墓皆余平生
之知己也余安得而不痛傷也日昇卒時日省尚無恙
也術者相視嘆以為不驗今竟若是豈其術者可信耶
而以君之才志氣而止於是耶銘曰

藍系中山自唐居吉頡頏文儒世有仕籍君家顯考為
都御史君少而孤御史賢子母陳來歸二子三女繼昌
弟雷既喪其母升猷從子鞠育孝誼伯兄述狀浪然隕

涕里閨有表墓門刻辭蒼蒼山木雲物昭茲

元邵武路同知蕭公墓誌銘

元之季世天下四分五裂其間盜名字者無慮千百計
獨閩之陳友定起徒步至列將相百戰首死為元東南
烈士未能或之先也當是時吾鄉豪傑多從之崎嶇嶺
海之死不怨朝廷音問實藉以通先祖太師公真我死
節事聞贈官先君子亦授資德大夫叅知政事詔使來
自海上友定遣江君伯昂與俱來且說熊天瑞於贛伯

昂與先公少相善也且言友定之意先公感激邀里中
蕭克欽輩數人俱至顓說熊天瑞天瑞猶豫先公以太
夫人老病不能行伯昂去報命克欽南逾嶺表間入閩
崎嶇兩浙出金陵轉巴蜀還寓長沙歷湘潭以歸與先
公謀曰吾觀羣豪智略獨友定忠義殆可倚也迺復之
閩友定承制授克欽奉議大夫同知邵武路叅其軍事
友定用法嚴往往致濫輒為營謀全活甚衆嘗引兵擊
賊建陽山谷間卒遇千餘人圍數重君執長刀躍馬奮

擊賊首兩人直前來刺將及忽大呼辟易其衆曰且止
且止此吾父蕭君也使詰之二人跪曰我嘗見獲於陳
公賴君救之得生今雖衆寡不敵我終不敢背德陣稍
却羅拜而去按治建寧光澤道中有七十人者執兵而
前跪曰生我者公也每思無以為報今幸道經我里敢
以白金百兩為從者獻蕭君不識也其人各言姓名及
所以營解再生之狀君慰諭却其獻而去洪武九年隨
友定至京友定死君以親老辭不仕歸田里年纔四十

二事親以孝聞讀書教子自娛初寒盛暑手不釋卷閭里親戚子弟從學多所造就洪武戊寅六月四日終於家享年七十二嗚呼可謂全名盛福矣君生元大定之丁卯纔歲餘母父氏卒繼母王氏鞠之愛逾已出岐嶷不凡將冠受書於安成羅先生學成教授於鄉卓然以不墜家聲為念而所以去就卒如此可謂難矣予嘗聞先公欲為傳其事不果今令子翰林檢討引高與予同修高皇帝實錄見友定之事而歎蕭君之不可作也引

高亦感泣奉狀請銘予不敢辭按狀公諱寅克欽其字
所為文章曰舫中集晚自謂舫中叟學者稱秋舫先生
其先世居山東有諱忠國者仕宋高宗為吉州防禦使
子文仲贅吉水城西張氏子孫遂為吉水人高祖典簿
公文布曾祖信可祖德永父雲心皆世積忠厚姻連仕
族君娶父氏繼娶王氏涂氏子男五人仲高奎高次引
高馮高持高皆能世其家女三人適仕族孫男十四人
曾孫男三人以壽終之歲葬君於邑之仁壽鄉落塘山

之原銘曰

有偉蕭君世之通儒縱觀四方識其睿愚得所宜居之
死不回從容進退鐘鼎若違蔬食之甘韋布之溫天錫
壽祉有賢子孫毀譽之真身後迺定盍視厥家惟善無
競

清河丞徐君伯權墓誌銘

前年從父原復丞華容為言國初侍兄原震為令清河
丞得鄱陽徐君伯權而進賢吳君庸為簿三人相得甚

協恭圖治其民至今追思之遇夜共讀書為詩歌文章
飲酒相樂言不及毫髮私昵剛濟其柔今則徐君已歿
吳公在嶺南而伯兄家居不相聞者久一念及之未嘗
不為之慨然太息也今吾又去為丞將以徐君為法不
知今若簿有若吳君之與伯兄乎若有之華容之政將
必有可觀而民將思之也從父之言如此時予未及細
詢徐君行事今年君之子奉君之從弟考功郎中旭所
狀行來請銘噫予所願為也夫何敢辭按狀君諱恕伯

權其字也幼穎敏六歲知務學受詩於絅齋先生每試鄉校輒魁元季寇陷樂平以鄉兵數千來會官軍復之帥第其功當授官辭不拜國初洪武庚戌以明經薦於鄉明年得仕臨清縣丞水陸之會地劇而民貧方大亂之後中山徐武寧王宿重兵居守君周旋上下與之贊劃教民禮讓招撫流亡申雪冤滯至捐俸勸分以業窮困興學校期年化洽調清河縣視臨清為有加踰二年以疾卒於京師嗚呼丞固難於令者也君所遇之難又

如此所致迺如此漢有循良吏豈足多哉惜乎未見其止也君生名家少從先生長者充其格物致知之學故雖天文地理醫藥武經衆技之說莫不旁通曲暢以輔翼仁義不流迂濶嘗從世父處謙行道中遇仇人結衆狙擊之君奮挺大呼其衆駭散有族人酗酒屢加以橫逆順受未嘗一反其唇孝慈睦族又如此其自少年時一呼殄寇復其鄉邑有功而不伐庶幾仁者之勇豈不深可惜哉君嘗自謂抱膝山人晚號釣雲翁文章有奇

氣凡若干卷藏於家生元泰定丙寅六月十九日歿以
洪武乙卯四月二十九日娶某氏子男二人同高騰縣
丞珠初仕為學官今為嘉興府照磨其先自五季世始
家樂平高祖剛顯祖公達父處信母顧氏里之塔山君
之墓也銘曰

運於桷削梁棟其佐小邑大吏天嗇其身裕其世

仲勤吳先生墓誌銘

洪武丙辰先君子之友胡延平卒於官仲勤吳先生延

平之妻兄也來經營葬事予從先君子識之胡延平家見其英邁不羣甚敬服之先君子曰小子未見孟勤先生世稱吳氏二鳳是其兄弟予請問其詳則曰先是莘樂先生與而祖同時倡義兵而祖不幸殞於兵莘樂亦賁志以歿其時孟勤兄弟年皆弱冠負文武才數以策干城守者皆不能用後悉如其言父與子皆豪傑之士也又曰元盛時江右詩人自范文正公揭文安公而下流於委靡獨擅音節而不失其雄渾者莘樂父子其尤

也去之十餘年為洪武丁卯始及拜先生於家得聞餘
論慊其平生明年先生復之楚又後十餘年侍先生於
史館痛先君子之不復作每授教為之興感先生亦念
故人之子愈加愛厚未幾而先生蒙恩得散地以佚其
勞遂以捐館聞予追平昔集次先生寄予書大篇短章
詞藻溢目老成忠厚之情及引教之意不覺其感愴之
至也欲為先生述傳而先生之子善存以庶子胡君光
大所為行狀一通求為之銘胡君延平之子先生之甥

也知先生家世羣行為尤詳謹按狀為銘先生諱勤字仲勤其先大梁吳氏徙居於荆至諱某者官南康子孫居廬山之陽宋淳化間有曰某者為永新簿因家焉曾祖原道妣某氏祖文振妣李氏父師尹字莘樂學者稱為桂山先生終永豐丞先生幼而敏悟初學語時能識錢文上字人皆異之十七八為文章詞藻天發歲癸卯太祖皇帝兵下吉安叅謀郭子章有詩名一見談論歡如平生即署為泰和令以親辭洪武初徵天下名儒試

中書堂第一人太祖欲作興儒學特除武昌儒學教授其化大行復以例免歸楚王致書幣迎為世子郡王師蜀王及湘獻王交致書問深相敬慕永樂元年與修太祖實錄特除開封儒學教授周王待以賓禮世子獨愛重之以永樂三年二月戊辰日卒於官距生元至順庚午八月某日享年七十有六明年善存以其喪歸葬於某山之原孺人蕭氏善治內事先十年卒子一人善存也一女適胡直先生晚居安福善存今為安福人孫男

某先生學極該博手未嘗釋卷老而不倦為文章詩歌敏而甚工善行楷書在史館時年七十餘矣運筆如飛天性孝友事繼母尤謹待姊盡其敬撫猶子極其慈接物平恕而賢否甚明善飲酒遇賓客故人傾倒達旦軒髯議論襟懷洞如也嘗念其先舍南康故曰匡山樵者居武昌曰黃鶴山樵晚更號由翁皆以名其文集并六藝集若干卷藏於家銘曰

豪傑之才該博之學剛大之氣壯而不遇時老而不大

施其所自著足以傳世煜然其光不可秘

夏侯時雨先生墓誌銘

於戲飄風雖驟不能以陰雨揚其塵蛟龍雖神不能以
白日離其倫博碩龢裕德文之士雖賢不能自必於用
雖用不能自必於顯通此所以多鬱迴轆軻而卒以困
終也古稱文人相輕余識交天下士道其鄉先生文儒
紛教謗譽角起究不可一差豁然不足啼獨山東豪傑
文武士與吾鄉雋庸人一口說夏侯先生霽學行山海

可仰於書無不讀讀皆通通則慮慮得善取予服守篤踐以教人無毫髮倦髦且益孳以故人皆悅從弟子進者先後數十百人而波其賸者蓋不知幾許矣又凝遠其風度不拘急若束縛者霞絢瑾玉宴笑因事誘論尤傾動其座人歆懌忱化不自知覺夷險艱通不為憂豫泰如也家居時年八十餘皓髯髮儼衣冠溫然不怒甚可愛敬此衆人所告予也今年春有儒者養直手文字一通大戚邑邑若有求請者謁入且言則先生冢孫

狀其族來請銘也嗚呼予生二十餘年聞先生名十餘
年矣且職在紀善惡敢辭銘按狀先生字時佐鄉稱時
雨先生生元至大庚戌七月二十二日戌時歿於洪武
庚午十一月二十七日辰時葬鄉之西車井頭礮配張
氏繼室劉氏子四人銓長文華應華又鑑劉氏出也女
二俱適人矣孫男四曰源曰溫曰淳曰泓者即養直也
銘曰

粵稽夏侯萌蘖於譙裔遷長沙爰吉是僑瀘水之瀝顯

衍孔昭代有卓傑在唐曰韶歷宋逮元暨於昌朝兩有
文武擁旗珥貂蟬聯有耀激其清霄猗嗟先生含華在
朝腴郁孔周窺規如姚一命司教吉士惟杓再命臨川
撫民不怵河潤膏施星輝岳岳金精失馭卷懷軼超邁
於熙和嬉於德輶齊魯大邦仰之喬喬自南自北感若
聆簡允也君子士林之翹人誰不死公有賢子子肖孫
哲億年未死我述斯銘以昭新阡從祖公友燧有舊文
公未通顯而克長賢賢者孔多晦一炳千潛德有耀卿

雲在天刻辭有泐斯文永傳匪文則傳世教不刊

莘雲歐陽先生墓誌銘

歐陽文忠公十六世孫諱衡字師尹學者稱莘雲先生
至正舉進士遇亂遂不復仕吉安守臣梁克中檄舉義
旗先生即遣子率豪傑千餘人首治水軍與賊戰摧其
鋒屢建勞績竟死於陣先生以書萬言陳便宜主將不
能用先生曰事不可為矣隱居山谷間時四方大亂尚
有學者義而從游先生不拒也入國朝屢有薦者嘗再

至江西行中書省皆以疾辭與先公同年生而月日稍後兄事先公先公之應詔赴闕也曰吾必不仕將以死自誓子幼無可托者此可少念耳先生即許以子妻予兄謂先公勿憂也已而先公亦得告還人皆謂先生友誼無愧古人先生於書無所不讀讀無不記雖山經地志稗官小說醫藥之術皆通析融會予少時因市得四書集成闕鄉黨篇先生口誦予書之已而得本較之不謬一字而取正居多其精博類如此平生未嘗疾言遽

色莊肅而和易學者嘗謂如先生誠所謂恭而安者也
所著文集凡若干皆可傳先生沒以洪武庚申年六十
有八世為吉水螺陂人其先自文忠公之孫紹世得部
符居吉水積符至諱雱者始家螺陂曾祖炎起宋進士
新昭州教授祖夢旗進士靖江軍節推父吾衡其墓在
龍塘山之原子仲訥孫忠孝少長余家今請為銘於其
墓故叙次俾刻之銘曰

文忠餘慶河漢輸浸灌川陸草木蓂沃其根抵枝扶踈

文章懿行與之俱博學隱德伍櫟樗將施後嗣仍環瑜
不信請考太史書

時和曾先生墓誌銘

元主中朝自泰定天歷後文治聿彰四方典教諸君子
悉皆碩德宿儒先大父竹梧公與道益張先生泣教吉
水州學鼓舞作新一時文物蓬蓬然起焉而時和曾先
生以鄉進士除撫州學正繼視學江州之德安贛州之
信豐悉以躬行為陶鑄凡所相勗以道德相迪以文章

猶先大父之於我吉也國朝高皇帝崛起草澤首以學
校為務而費君震李君恒相繼知州事以興學育才為
已任慕先生之德邵年高復以禮聘為本學司訓先君
子筠澗公與焉時縉在庠舍聽其講論得熏氣味知其
淵源有自來矣蓋先生系出名宗生近聖居平生積德
累學仕終教職莫究顯融然鬱積之厚慶流宜未艾云
先生諱琦時和其字也其先武城族有諱仁者徙居吉
水儒學前為古城始祖登宋咸淳進士全州司理參軍

古澗諱革先生曾祖也祖諱福遠父粹中以書經中元至正江西庚申鄉試第一諱廸先生仲兄天和也娶彭氏子二長伯謙次仲誠早世孫三紹初用初顯初紹初由明經為丞宣城學道愛人無忝厥祖謂縉素習其為人以狀求為之銘先生生元皇慶壬子八月十七之巳時歿洪武丁丑十一月初十日之子時享年八十有六葬四十四都片月形松山之原噫如先生者洵可謂存順沒寧已余安能已於銘哉銘曰

生近聖居傳得其宗泣教諸州模範與同文興字水古城之功仁山峩峩先生之風

徐學臯先生墓誌銘

宋亡元興吉水東門徐氏起家至萬石然本儒者延賢先生業應進士舉過其門弦誦之聲未嘗絕也富而不驕義而好禮由是部使者有旌門之舉雖仕為小官能有惠譽揭文安公以黃丞相擬之者平遠公也遇亂出軍需畫策與親戚舉義兵保障水西者城南公兄弟平

遠諸孫也予不及識之見其與先公賡和詩有杜少陵之志而敬慕之者為城南公子學臯公公當國家隆平之會歸復故居衣冠典刑柱石其宗者餘四十年一時學者欲考見前代故家之風流皆從公質問焉而公樂以告人忠厚明辨聽者莫不欣然有所得也予少時先公竒愛之託公議婚公即云吾季女賢可以為婦且術者云必為命婦遂許適余予自諸生致位通顯待遇一如賓客之禮每送予別臨岐至江潁舉酒寬慰祝願深

情繾綣在遠道數千里數寄書問臨終猶屬其子孫致
意於予於戲予別去纔歲餘歸而公音容不可覩矣豈
不悲哉公諱泰字子開學舉其號也母蕭氏早歿事繼
母胡極其孝事兄極其謹兄卒撫猶子極其慈教子孫
惟事詩書謹飭處鄉閭人服其公正歲時宴集家庭延
接上賓連旬日夜達旦飲酒不亂醉猶恂恂然一談一
笑皆中禮節真可謂之淳厚君子歟其家世本金陵予
既序其家譜茲不贅述公娶曾氏蘭溪大族宋忠節公

三聘諸孫曾必譽之女有賢行子三長亨字叔通次讓
字叔遜季吉字叔廸女三長適積符朱廷綱次適夏璜
劉汝瞻季適子孫男十公生至正庚辰八月四日永樂
己丑十月十七日卒享年七十將以庚寅十二月庚申
日葬於所居鑑湖之西阡諸子泣請予銘銘曰
德內榮不求名既固既安惟永寧

劉君允中墓誌銘

劉守中河間人宋末陷於金天下重其醫術稱劉河間

而不名其醫上與長沙相接下與鄆城為宗鄆城得麻
知幾為作儒門事親書能發明河間之旨世皆喜傳之
予嘗過鄆城求其遺跡訪其土人咸謂知幾能文然不
甚知醫故其書多遺獨劉河間自能著書若宜明直格
之類行於世者甚多然又皆非其真也其子孫後遷江
南必有得其傳者予因記少時聞鄉先輩劉君允中有
河間秘書從其子日升所借讀而歎之曰吾固謂河間
當有秘書喜其在是矣日升泣然以泣曰先子之所屬

也系本河間而莫詳其世數予以質之家君曰有之初
允中之祖芳茂自河間徙居江州宋李達泉梁先生以
醫游江州義同倫合與俱歸吉水焉芳茂生德榮榮生
子七人其季即允中自幼淳厚寡言恪然忠信撫孤濟
貧不為德色至元中為吉水醫學教授壬辰之亂遇賊
於鄉刃既及之有數人大呼而前曰是真善人何可殺
也所至得免盜不忍害論其學行蓋無愧於河間者也
予竊識之允中入國朝醫術尤振治無不愈不獲迎至

以為枉死連郡人敬信之車輿騎從絡繹不以早夜絕其門尤通習地理百家之言不自炫耀退然若不勝與人言如恐傷之生於延祐甲寅十一月二十六日沒以洪武癸亥四月八日配毛氏子方升醫有名江淮間先卒繼李氏有家法亦習於醫子三長文升次復升日升其季也君沒時尚少能自力於學後二十三年以書選入翰林始克狀其行請於予曰知先人莫若君先大夫先大夫已矣得聞論說宜莫如君子往年嘗欲輯次允

中父子治病異效事繼太史公淳于倉公傳因循弗果
為今亦未暇細也姑就其所聞大略為之銘曰

昔在河間卓哉守貞著書傳述千載一人孫在江南書
傳允中謂藥非補而惟主攻去病而已百發百中譬之
用兵豈必持重我欲傳之著其治功後有作者其書可
宗

趙君用哲墓誌銘

君諱哲字用哲始祖不倖從宋高宗南渡官至提舉封

吉水縣子因家焉後五世至必學宋進士僉書吉州判
官聽公事元以為四會尹不拜公高祖也曾祖啓元祖
叔順父存誠君生而敏穎不為嬉戲稍長益務學好讀
書寒暑忘倦詩詞出語驚人時學闕弟子員縣官聞其
賢欲招致之君之父亦慨然曰當使之立功繼前光遂
入學名譽日起從子章劉先生治書經先生極口稱道
之同門之士皆自以為不及也洪武丙子中江西鄉試
進士舉明年會試得乙榜時川蜀以學官闕聞太祖諭

吏部慎選江西人士為之遂覆試君得夔之梁山教諭梁山僻縣學久廢君興廢舉敗陶頑鑄鑛翕然遂與赤縣等人皆悅之丁內艱歸鄉生徒送之皆垂涕泣居喪無違禮服闋調廣之徐聞教諭其教化益盛於梁山明年今上龍飛君朝於京師京師名卿貴人爭欲薦君君力辭曰教官吾素志也事君以身不若事君以人吾多育賢才以為國用顧不可耶遂不敢強歸至徐聞以疾卒語不及私但謂弟謀曰恨無以養老親志年纔三十

三君生洪武壬子沒以永樂甲申明年乙酉謀始奉君之柩歸葬於鄉水磨坑之原母某氏娶龍氏無子子表弟翰林檢討劉君宗平與君同貢又同官蜀中少同事劉先生知君最詳乃述狀求為之銘狀稱君有智略善談論美姿儀鬚鬢郁然事親以孝聞尤善教其弟兄弟怡怡如也內睦九族庭無間言輕財重義喜周給其於友朋藹藹如也既沒之明年朝臣尚有交薦之者部符下而君卒矣宗平所為狀如此皆得其實云銘曰

宜壽而夭宜嗣而無後老父白首扶行送柩九族哀傷
士林相弔嗚呼無所歸咎

劉君象賢墓誌銘

元季之亂大家世族能卓然不為亂賊所污保其家復
其盛昌其後者江鄉甚不多見也予嘗聞之夏璜劉君
象賢兄弟首謀夜之吉安城報官軍掩取賊巢穴事泄
官軍竟不至舉宗為賊所屠亦皆不屈君與妻子幸走
免賊平廼歸鄉治生築居教子孫復其舊規其艱難轉

徙有人所不能堪者焉先是賊首欲鈎引劉氏相表裏
作亂遣人致意使當時一聽許寧不能免屠害與艱難
轉徙哉君憤然罵曰所以為世家大族以其守禮義也
予家在宋仕吉水縣簿宋亡與信國文公百戰守死以
抗元師終不為屈至元雖乏顯仕然父祖以上感其恩
澤亦百餘年豈可伍梟獍為厲階耶若義舉無成雖受
賊禍亦不辱先人之志矣不然何顏復見家廟乎予深
感其義歸以其事與語告太夫人太夫人曰外大父灞

雪高先生官平江在元盛時象賢其季壻也來平江未嘗逐游事聲色侈靡其家教素嚴外大父每稱道之不置又聞之先君子云夏璜劉氏世本安福治尚書有名象賢大父諸父昆弟每過從談論其學問淵源非泛泛然比也由是常喜從君問昔時事與之言歷歷未嘗厭焉後予忝科第歸自翰林往拜謁之君為之喜甚與飲酒日夜具道外大父遺訓命其子汝哲與遊觀山水間指外大父所為卜葬其祖墓而為道其所以然見前人

之游藝罔不造其妙而君平生坦夷豈弟愛人樂善敦尚詩禮其得於家庭親戚為尤至也又往年予兄大經授徒夏璜君實為之主汝哲親授業焉君朝夕所以與予兄講論多矣是予兄弟皆有所聞於君也君之喪也在洪武辛未三月九日予時寓京師後歸鄉君墓有宿草汝哲屢以銘請始克為之君諱崇字德象象賢其號也族有譜予嘗為之序曾祖時可祖至德父則賢母龐氏娶高氏再娶蕭氏子男三人汝霖汝哲汝完女二人

孫男六君生大定丁卯四月十三得年六十五墓在鄉東坑之原銘曰

守義不辱光明正直學問淳良家庭親戚平生之言可俾世教有銘可鐫有子能孝

黃君仲簡墓誌銘

黃君仲簡既沒之十年其女夫龐振舒應詔來京師奉前陳州守李君子儀所為狀請予銘其墓予兄大紀與徐君叔通交口稱譽歎息謂宜為銘其凡知仲簡者皆

言其磊落可喜而悲思之嗚呼去之十年而人尚不忘
與其在世無異則其在世豈無制作過人者歟按狀先
世某既沒家亦中廢崎嶇多難君理其先業而充廣之
及有贏財輒斥以起其廢其鄉官陂之橋圯具甃與石
要道士彭一寧董其役橋成而行者以便楓子江當二
水之交朝涉者或致沒溺置船而濟者以喜株木陂溉
田數千畝復之而歲以無旱隣里有貧民每春夏農事
急無所仰食輒貸之穀而未嘗取其息為家塾延良先

生教其子弟治家嚴而有法事兄恭而有禮友愛諸弟撫育孤甥勤勤懇懇尤喜賓客四方游士過其門禮接之如將不及蓋久而未嘗厭當其廣席酒酣抵掌論事豪氣橫放殊磊落可喜也狀所稱者蓋如此憶余少時嘗與君游登山臨水從觀闌闌之間為言其生平志意浩歌擊節當世人可其意者殊少也又謂古之久遠者姑勿論近自元季耽溺宴安俗尚柔弱鄉里富豪家士人子驟聞金草之聲手足振掉目眩眩耳不聽坐而待

斃妻子為虜可憫不足恤者何限我先人誓天仗義鳩
集義旅盜賊莫敢犯吾鄉迄為保障以迓治平至今室
房有故宇圖書有故藏里人無流離之苦田野無荒棄
之時山林無斬赭之虐一草一木之遺皆先人之遺澤
也我恨當其時尚幼日習焉不能助我先人建大勲業
先人亦賁志以歿此古英雄奇偉之士所以汨沒而無
聞者類如此也審其言固侗儻可喜夷考其任事馭衆
低昂有度權正合宜人皆畏之因其小者大者可知或

時以泄其不平披橫矛彎弧突騎獵逐平原曠野之中
望之偉然文武可用亦庶幾奇男子世豈多有哉於戲
是安得不久而想見之尚如畫也哉君諱敬號竹澗高
祖顯民始家於吉水曾祖端叔躍淵其先人也君生至
正乙酉七月初二日以洪武乙亥閏九月十三日沒於
京師年五十有一歸其喪者季弟禮與壻朱正也娶周
氏里之名家子男四人復安既安居安太安女三人有
陳彥素者亦其壻墓在其鄉鷓鴣山之原銘曰

憶慨慷言可績才可惜金利不矛戟績粟不為璧永秘
茲石

徐君耕樂墓誌銘

洪武戊午太學生徐均仕為肇慶府陽春縣主簿陽春
故春州也瘴癘毒霧聞者惴慄每使者當按行託故避
去由是縣豪得雄據為姦利縣官至受頤指少忤觸之
輒死前後莫敢忤受頤指幸滿考捆載去均廉知之至
縣吏白應往視莫大老叱曰何物大老復白此洞主老

病家居宜就見叱曰若化外抑民伍也亟走來見不然
且奉國憲正法出雙劍示之大老聞恐懼乘板輿至叱
使下拜不得已蒲伏熟視諭遣之即伺其語有異而府
符下問之遂繫之獄均曰是其人必且來劫獄戒吏士
操鼓角柵其私衙自帶劍挾弓矢披甲長嘯大老三子
果各將其衆來聞之皆惴莫敢前詰朝昇兩大瓜安石
榴十數枚致饋皆黃金大珠也均不一視即麾出械繫
大老身送之府中後府官竟受賕大老脫歸數致前所

饋均一再拒之發怒欲捕治大老震慄求府符調均攝
陽江縣陽江亦治服而均丁母憂去此史氏之文也徐
吉州大族南唐中書侍郎上饒郡公遜之後曾祖林隱
先生先公外大父也祖本仁父仕麒母姜氏其遇元季
之亂年纔十三先公時在太學先祖死節仕麒挈予兩
家避難崎嶇二十年經紀扶持克復安業皆其父子予
是以知之尤悉子畊其字畊樂號也其少時聰敏十五
六歲僑居授徒志行卓然從勤憲王先生治尚書離亂

中成學黃霸夏侯勝事何以過哉國初為縣學生卒業
先公之門洪武乙卯貢太學試中書御史臺入高等分
教山西夏縣後官會同謝事家居以壽終其事親事師
誠懇篤摯古賢人不能過也享年五十九配王氏子男
二人壽今為工部主事光邑庠生女三人適姜某胡某
蕭某其墓在吉查坑之原銘曰

士行全勅銘堅千萬年廉潔徐君之古墳

周吾文墓誌銘

於戲予二十餘年見周氏祖子孫三世讀予家書見余
從祖父及先君子先叔父之文為周氏作者亦多有之
而其家字吾文者先君嘗謂予曰善承其父志其父宗
祥其季父宗瑞兄弟以友愛稱人謂宗祥仁兄宗瑞悌
弟吾文令子余少皆不及拜其門而識之予家孰謂宗
祥兄弟之墓皆余為文刻石識之而吾文之子宜哲復
以翰林蕭君引高所為吾文行狀請余誌其墓而為之
銘安得不重為感慨歟按狀吾文諱琛兒時穎悟好書

大父本立長者有智鑑嘗曰此奇兒也必興吾家出入
與俱設疑難令剖決出人意表及理家事井井就緒如
老成人元季之亂佐其父舉義兵保障鄉里攘斥羣寇
禮下賓客撫納流亡所存活甚衆以功陞吉水州判官
家吉水之醪橋市人共榮之已而內附從鄂國常公攻
下贛州陞吉水州同知而祖母鄧氏卒因謝病免散其
兵為農事事親極孝養歲時宴集賓客之盛輿馬照映
固已下視陳孟公之流其一門四世同產合食庭無間

言雖古稱義門無以過之也於戲使吾文父子至今猶在也豈不成就為鄉之模範歟於戲惜哉其生時泰定戊辰歿以庚辰葬於鄉草子山之原母陳氏妻陳氏子男三人宜大宜民宜哲也銘曰

有美哲人溫其如玉山輝晴霞風采濃郁早知學問親師擇友義勇英謀志殲羣醜時智時愚時止時仕人謂松雲不斥其字德惠鄉閭慶流孫子百世之下佳城鬱蔥讀茲有感尚想英風

江孔殷墓誌銘

嗚呼孔殷舍我而遽死耶今欲為汝墓銘執筆嗚咽欲
下復止者數矣不知泣涕橫流而與筆俱墮也嗚呼何
其哀之至耶嗚呼予嘗恃汝以為身後之託而反執筆
以銘爾墓耶又嘗恍然而自語曰豈夢寐耶而今汝真
死矣幾將一年青燵逆旅叙平生之事而為之銘憶孔
殷年十餘歲時避仇鄉之夏璜予讀書東溪彭氏童奴
負之過廬原嶺始教之學其時已穎敏過人為編次杜

詩作字端謹動止循良予方學舉子業每坐達旦輒從
旁注視稍能通大意予甚竒愛之後數年予舉進士得
官侍親還家始務為古文辭又嘗坐達旦獨孔殷與俱
雖動靜言笑無不視予所為者予又勉之曰求之古人
我何足學其所為書札經義皆與予亂真予久自不能
辨也其家世名儒南唐末諱某者知吉水縣因家焉世
承饒裕幾甲一鄉然觀其意則一毫不以動心而專力
於學其勤又甚似予也去鄉而學遂成聞其舉進士京

師會試中居前列入對大廷聖天子遣中使視之錄其
文以進文武羣臣合口一辭皆謂其當第一既析名乃
第五物論殊以為屈而孔殷欣然稱已過分會有詔賜
還鄉里孔殷為廷臣所舉留不得去入與纂修孜孜不
怠得疾旅舍予以事冗不得早夜視之以為至恨但少
間時得一會語不及私不數日竟死嗚呼其為痛宜何
如也將殮予視之猶見其血泪相和以流予兄大紀與
弟淳夫往殯之城南之鳳臺里將以某月日歸葬其家

世與予有連曾祖崇德龍泉教諭祖仲溫父彥政母劉氏劉氏之母先太夫人同產也其母早亡太夫人視猶己女而江氏於予家比隣兩家往來甚密仲溫之死也因哭先君子卧病歲餘余歸自京師方疾起予坐語移日不數日遂卒臨終但語孔殷以力學大其家可謂光榮如其志矣而竟止於是耶其配王氏有子一名彛銘曰

其才學之偉而志氣之巍而父母之鍾愛而國人之期

待而可謂遇時而命之衰已而已而

先嫂歐陽夫人墓誌銘

夫人歐陽氏宋名臣文忠公之後自穎復居於吉水之
迹符有諱芝者為螺陂蕭氏壻始居螺陂生炎起寶祐
元年進士教授新昭州與余家有連六世祖上猶府君
之墓也實為之誌炎起生夢旗咸淳四年進士甲科為
靖江軍節度推官不仕有文學兼通於醫用以濟人子
衡字師尹至正庚寅鄉貢學者稱莘芸先生夫人之父

也余少時讀先祖墓誌已知慕昭州公而華芸先生又家君莫逆也嘗受聘迎為考試官與家君同被徵起同得辭謝故戶部尚書費公震初知吉水以家君二人者之相善謂宜相與為婚姻故夫人歸於我家兄時洪武丙辰余未成童然喜為文字先生至予舍輒從問經史大義先生甚喜諄懇教誨歷年訓詁不遺餘說每至夜分夫人具燭火為酒食湯茗未嘗敢言倦家君性嚴重治家剛明有法度雖臧獲不能一出語違義禮外親子

侄至不敢仰視夫人溫然不怒而整服於禮法家人輩稍有乖違略顧視其容辭自不勝其愧者余兄弟亦素剛明余少尤明察人難當其意者夫人歸於家三十年中間從余兄官京師歸葬二親葬歐陽氏三喪其兄早卒經紀其家撫其餘孤家君及太夫人在時稱其善綜理予兄於家事悉以付之無違其意者見予之幼而長仕而顯學而有文章致其意請銘其父母之墓其子禎期今年來京師受主上眷知以書學選為天下第一人

被特恩習書策東宮將迎致之而夫人卒於家可哀也
己夫人諱晚字季晚生至正辛丑六月十一日午時沒
以永樂乙酉六月十二日午時年纔四十有五母鄧氏
宋嘉定進士提刑剛之後余家鴈門解氏自唐世家於
吉余兄綸字大經與予同登洪武戊辰進士第太夫人
高氏唐南平王崇文之後元至正辛酉進士贈中書平
章灞雪先生之女夫人之歸於我家年尚少凡女工織
繡治饋之事無不循習皆太夫人教之也子男一人字

禎期女七人長適東螺彭懷次適螺陂蕭肇敏次適周
光華次許適夏璜劉某節幼在室孫男二人榮祿榮宗
女孫一人輝真夫人之墓在中鵠鄉五十二都東螺乙
辰山戌辛向其銘曰

漢有星兮粲七襄孰殯質兮無遺光勒銘辭兮示廟藏

文毅集卷十三